

Janine Soliana-Vingal, cabesante di Colegio Santa Teresita:

Disciplina Consciente ta enfoca riba desaroyo social emocional di alumnonan

ORANJESTAD- Bao di un aubade cantando e cancion popular di The Learning Station, esta "Toe, Knee, Chestnut" e alumnonan di Colegio Santa Teresita den tur euforia, a yama Minister di Enseñansa Michelle Hooyboer-Winklaar bon bini na momento cu e mandatario hunto cu Departamento di Enseñansa a haci entrega di un pakete di material pa cu e implementacion di e programa pedagogico Conscious Discipline na Colegio Santa Teresita, estableci na aña 1933.

E scol a cuminsa implementa e proyecto despues di algun curso, pa siña alumnonan comunica a base di sentimento, siñando con pa scoge y con pa tuma decision.

Cabesante di Scol Santa Teresita, Janine Soliana-Vingal a agrega cu ora cu e scol a entrega su plan di maneho na fin di aña 2012, nan a inclui e programa Disciplina Consciente den dje como parti di maneho pedagogico. "E ta un programa cu nos ta kere den



dje y for cual nos ta mira resultadonan fabuloso."

E metodonan di Disciplina Consciente ta wordo uza pa yuda e alumno, desde e prome momento cu e ta yega scol, pa relaha y enfoca riba e dia su dilanti cu cancionnan y otro partinan di e Disciplina Consciente manera tuma decision, siña scoge y con pa resolve y anda cu problemanan.

Minister Michelle Hooyboer-Winklaar a haya un recorido den diferente klas pa por presencia con ta implementa



e programa. Den klas 1^a, juffrouw Kimberly D' Aguiar a duna un splicacion con e implementacion di Disciplina Consciente ta bay dor di laga e propio alumnonan "Inter-act" cu otro.

Den Klas 2B, juffrouw Tayliza Bernabela a duna un demostracion di e Shubert "I Choose" un storia di tuma decision y di escogencia y splicando e mucha con e por scoge na diferente ocasion.

Mientras cu den klas 3 juffrouw Margot Kamsma, a

base di duna apoyo y premiacion ta mustra e muchanan e importancia di bon comportacion y con leu bo por yega cu esaki.

Actualmente tin 11 scol cu ta implementando e programa di Disciplina Consciente bao di guia di Departamento di Enseñansa. Tin diferente otro scol cu tambe a cuminsa implementa elementonan di e programa riba nan mes, manera Brain Smart Start. E cabesante Janine Soliana-Vingal y su team a keda hopi entusiasmo cu e invitacion cu

nan scol a ricibi pa e proximo tayer cu ta tumando luga nan Aruba.

"E resultadonan ta positivo desde cu nos a implementa e programa aki y sigur nos lo continua, e muchanan y docentenan, nos tur ta sinti e efectonan positivo, na scol y den tur otro momento di dia", asina e cabesante a termina bisando mientras cu e tabata presencia con Minister mes ta duna un demostracion na e muchanan, cantando den bos halto "Toe Knee chestnut knows.....I love you!" □